

XLI

1305-III-14, Guadalajara.—Al concejo de Lorca. Confirmando sus fueros, privilegios y franquezas. (A.M.L., perg. 28).

Sepan quantos esta carta vieren commo nos, don Ferrando, por la gracia de Dios rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Molina, por fazer bien et merçet al concejo de Lorca, por muchos seruiçios que me fizieron a mi et a aquellos donde yo uengo, do et otorgo et conffirmoles fueros et priuillejos et cartas et merçedes et libertades et franquezas et vsos et costumbres et terminos que ouieron et an de los reyes donde yo uengo et de mi. Doles et otorgoles todas estas cosas sobredichas que lo ayan bien et conplidamente pora sienpre jamás, tan bien a los que son agora commo a los que y seran daqui adelante, saluo el escriuania que yo di a Pedro Ferrandez, mio escriuano. Et otorgo de les non yr contra esta merçet et conffirmaçion et carta que les yo do en ningun tiempo et de les enparar et deffender con ello que ninguno non ge lo contralle nin ge lo enbargue nin les passe contra ello por ninguna manera, so la pena que dize el priuillejo que ellos tienen del rey don Alffonso, mio auuelo, et conffirmado del rey don Sancho, mio padre, et de mi. Et porque esto sea firme et estable pora sienpre jamas, do les ende esta carta seellada con mio seello de plomo.

Dada en Guadalhajara, catorce dias de março, era de mill et CCC et quarenta et tres annos. Yo [Johan Sanchez] la fiz escriuir por mandado del rey. Sancho Martinez, Alffonso Diaz, Alffonso Ferrandez.

XLII

1305-III-20, Buitrago.—Al concejo de Lorca. Merced de todas las rentas para las labores de las torres, adarves y muros. (A.M.L., perg. 4).

Sepan quantos esta carta vieren como nos, don Ferrando, por la gracia de Dios rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Molina, por fazer bien et merced al

